

Noticia
Transparente
di Gobierno

ISLA ONLINE

Dialuna 2 December 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PROME MINISTER

Evelyn Wever-Croes

Danki na e vision, determinacion, trabou, dedicacion y aporte di gobierno, departamentonan di Gobierno y sector priva

A CUMINSA DUNA BEK NA NOS COMUNIDAD CU E ESPACIO FINANCIERO CU A SER CREA



Nos economia a recupera impresionantemente, danki na e crecimiento di turismo, y ta premira cu e lo sigui crece e añanan nos dilanti. Danki na crecimiento di nos economia, desempleo ta na e punto mas abou den mas di 20 aña. Tin trabou pa tur hende cu kier y por traha, y hasta tin un scarsedad riba mercado laboral. Danki na tur esaki, pais Aruba a logra crea un espacio financiero, pa por duna alivio caminda tin mester, pa por haci e inversionnan necesario, y sin negligencia e fundeshi financiero, cu e obligacion di sigui paga debe bek.

Diahuebs anochi, den su discurso nacional, Prome Minister Evelyn Wever-Croes a duna un resumen di tur loke Gabinete di algun logro clave cu tawata posibel danki na e espacio financiero cu Gabinete Wever-Croes a crea.

A DUNA NA EMPLADONAN PUBLICO

Danki na e espacio financiero Gobierno por a cumpli tambe cu empleadonan publico, dunando nan un indexacion di 11.7% despues di 8 aña cu nan no a haya indexacion. 6% a wordo paga caba na juli, y 5.7% lo wordo paga na januari otro aña.

A DUNA NA PERSONANAN CU NO POR TRAHA

Danki na e espacio financiero Gobierno a aumenta e asistencia social na personanan cu no por traha, e asina

yama gehandicaptenuitkering, cu 130 florin pa luna, y lo sigui aumenta esaki den e añanan nos dilanti, na forma responsabel.

A INVERTI DEN ENSEÑANSA

E espacio financiero a permiti Gobierno pa porfin por haci inversionnan necesario na Aruba, por ehempel den enseñansa, cu Scol Aloysius na Noord completamente renoba, y proyeccion pa un Julianaschool MAVO nobo na Paradera.

INVERTI DEN INFRASTRUCTURA

Tambe inversionnan den nos infraestructura, por ehempel den retonde na Palm Beach, e caminda dilanti High Rise hotels, e caminda di Tanki Flip pa Kibaima, y varios otro caminda den nos barionan.

INVERTI MAS DEN CUIDO DI SALUD

E espacio financiero a permiti Gobierno inverti mas den cuidado di salud tambe, a converti IMSAN den un hospital cu 20 cama, a amplia e servicionan cu radiotherapia, y awor ta preparando pa inversion den un petscan.

INVERTI DEN HUSTICIA

E espacio financiero a permiti Gobierno inverti den husticia, den mas ekipo moderno y mas personal pa asina por tene Aruba sigur. Y e resultadonan ta bisto, segun varios fuente, Aruba ta e pais mas safe, mas sigur den nos region, y turistanan ta indica cu esey ta un di e motibonan cu nan ta sigui bishita Aruba.

“Tur esaki tabata posibel, danki na e vision y determinacion di nos gobierno, pero mas aun, danki na e trabou y dedicacion di tur esnan cu ta traha den e departamentonan di gobierno, y na e aporte di nos sector priva den yuda hiba nos pais padilanti. Awor cu nos ta dilanti un otro fin di aña, ta un bon momento pa nos para keto y mira atras kico tur nos a realisa. Con duro nos tur a traha cu awor, apenas dos aña despues cu nos a sali di e pandemia, nos pais ta para firmemente riba su pianan”, Prome Minister a expresa. ■■■

Prome Minister Evelyn Wever-Croes: Gobernacion ta algo serio

NO TA TEMPO PA PURBA SCORE "BULANDO CU HALA DI MANTECA" PASOBRA BO TA CAUSA E PUEBLO DI ARUBA DAÑO



Otro siman diabierna dia 6 di december nos pais ta bayendo urnanan electoral, pa scoge nos parlamentarionan nobo, y asina haya un gobierno nobo pa e periodo di 2025 pa 2029. Prome Minister diahuebs anochi, den un discurso dirigi na henter pueblo di Aruba, a duna un resumen di e maneho financiero responsabel di Gabinete Wever-Croes despues di varios reto encontra y e reto di pandemia.

Prome Minister a enfatisa cu den e añanan nos dilanti, pais Aruba mester sigui mantene su mes na e disciplina financiero aki, pasobra sin finanzas, no por haci mucho. No ta tempo pa purba score "bulando cu hala di manteca" pasobra lo causa e pueblo di Aruba hopi daño.

Den e ultimo dianan aki prome cu eleccion dia 6 di december benidero, politiconan di oposicion a haci varios promesa entre otro pa elimina un cantidad di impuesto y aumento di

un cantidad di entrada. Prome Minister a enfatisa cu esakinan ta promesanan no realistico, y si nan wordo ehecuta manera nan ta wordo bisa, mas bien ta compromete Aruba cu debenan nobo y presion financiero nobo. Mester tene cuenta cu esaki por aumenta inflacion na Aruba y perhudica e estabilidad financiero cu Aruba ta logrando.

Prome Minister a enfatisa cu gobernacion ta algo serio. Aruba ta saliendo for di dos crisis cu a devasta nos pais financieramente durante ultimo añanan. Esun prome ta di e crisis financiero cu Gabinete Wever-Croes a hereda na 2017 di e gobierno anterior. Esaki a resulta den un KB di Hulanda cu ex prome minister Mike Eman a haya pa su mal gobernacion.

Despues a sigui e Crisis di Pandemia cu a causa un crisis di Salud y uno Financiero Economico pareu. Ta awor apenas Aruba a cuminsa paga.

"Awe Aruba ta riba caminda di progreso y recuperacion, pero nos pais ainda ta VULNERABEL. Aruba tin un debe nacional di mas di 5 biyon florin ainda cual tur aña nos mester paga y riba dj'e, pagando mas di 300 miyon florin na interes. Ta cu un maneho responsabel, prudente y strategico nos ta pagando riba e debe, invertiendo den prioridadnan urgente y dunando bek loke nos por na comunidad, pues den un forma responsabel", Prome Minister a remarca.

Prome Minister a expresa cu Gobierno ta desea di por a haci mas, Sinembargo "Bo no por fia pa bo duna", pasobra esey ta bay contra normanan financiero, y pasobra despues loke bo a duna bo tin cu paga bek y cu interes. Esey no ta sostenibel, bo lo agota bo recursonan y BBO lo tin cu subi hopi; esaki lo significa cu costo di bida y inflacion tambe lo subi.

"P'esey mi ta ripiti, Gobernacion ta algo serio, no ta cuestion di purba score 'bulando cu hala di manteca', pasobra bo ta causa bo mes y e pueblo di Aruba daño. Tin ehempel suficiente di paisnan Europeo y di Sur America cu a bay haci esaki y nan fondonan entre otro di pensioen a kibra y a perhudica henter e pais.

Loke si nos Gobernacion a haci y ta haciendo ta mehora e capacidad financiero di Aruba pa por inverti y pa duna alivio, pa mehora e calidad di bida di nos ciudadanonan den forma directo y indirecto", Prome Minister a duna di conoce. ■

Prome Minister Evelyn Wever-Croes:

GOBIERNO A CLAUSURA E CICLONAN DI E PROYECTO DI INNOVACION DEN ENSEÑANSA EDUTECH

“E proyecto aki ta uno hopi bunita, y mi tine serca na mi curason. Mi kier a gradici tur e scolnan cu a kere den e proyecto di innovacion aki, cu ta e yabi real pa enseñansa pa futuro”



Durante un celebracion ameno na Universidad di Aruba, Gobierno di Aruba a clausura e ciclonan di e proyecto Edutech, cu ta un proyecto di innovacion den enseñansa. E proyecto aki a inicia bou di ministerio di Prome Minister Evelyn Wever-Croes dos aña pasa, cu resultadonan exitoso. Na prome instante Gobierno a inverti den e proyecto di eLearning na unda a busca scolnan piloto. Mirando e exito y importancia di innovacion den enseñansa, a dicidi pa invita tur scol na Aruba pa inscribi nan proyectonan di innovacion cu nan ta desea, di cual un panel completamente independiente a tuma un decision y escohe e ganadornan.

Prome Minister a indica cu e tarea di e panelnan aki no tabata uno facil, y cu cada kwartaal tabata tin 1, 2 of mas ganador. Gobierno a pone un total di 800 mil florin disponibel pa e proyecto di Edutech di cual resultadonan tabata hopi bunita. Di 87 proyecto cu a wordo aplica, 24 a resulta di ta ganador. Un total di 52 eBoards a wordo duna, 157 tablets, 188 laptops, y 3 lab, cu ta areanan multi-funcional di digitalisacion y innovacion na e scolnan mes. E scolnan cu a participa ta representa tur bario y diferente “schoolbestuur” na Aruba. Di e 23 scolnan, 3 tabata hoger onderwijs, 2 tabata middelbaar onderwijs, 13 scol basico, 5 kleuter school, y un scol di educacion special.

“E proyecto aki ta uno hopi bunita y mi tine serca na mi curason. Mi kier a gradici tur e scolnan cu a kere den e proyecto di innovacion aki, cu ta e yabi real pa enseñansa pa futuro. Mirando e importancia di innovacion, innovacion den enseñansa tin cu continua. Un danki tambe na tur docente, mayornan, y alumnonan pa sostene e proyecto bunita aki, y pabien na tur e scolnan ganador. Tame mi ta gradici Minister di Finansas Xiomara Maduro cu semper tabata cla pa yuda cu fondo ya cu e 800 mil florin aki a bin completamente for di presupuesto di Gobierno, y un danki na ex Minister Endy Croes cu a permiti nos drenta den e scolnan y cu a sostene e proyecto aki.

Por ultimo tambe mi kier gradici Futura cu ta e fundacion cu Gobierno a lanta na 2018 pa stimula y promove innovacion den e aparato gubernamental. Futura a carga e proyectonan aki di educacion na un forma hopi profesional lagando atras un structura di kico ta traha y por traha pa Aruba. Innovacion den enseñansa lo continua, y mi compromiso cu tur nos hobennan ta pa sigui inverti den innovacion y den enseñansa” Prome Minister a expresa.

Prome Minister Evelyn Wever-Croes



Prome Minister Evelyn Wever-Croes:

PROME MINISTER TA FELICITA HULPBESTUURSKANTOOR CU 65 AÑA SIRBIENDO ARUBA



1 di december, ta recorda cu 65 aña pasa e prome Hulpbestuurskantoor (HBK), a keda estableci na Aruba. Awe, nos ta reflexiona riba e rol fundamental cu HBK tin pa sirbi pueblo di Aruba desde su fundacion te cu awe. Desde su principio, HBK’nan a bira un institucion di confiansa na Aruba, dunando apoyo esencial riba procesonan y documentacionnan importante y servicionan na nos ciudadano den nan propio bario.

Durante e 65 añanan aki, HBK a evoluciona segun tempo y tambe a pasa door di e transformacion digital pa haci e procesonan mas eficiente, accesibel y facil pa uza pa nos ciudadanonan mientras ta keda duna asistencia na esnan cu no tin acceso na un computer of no tin tur conocimiento di maneho di esaki.

Prome Minister Evelyn Wever-Croes ta gradici tur ciudadano cu a dedica trabounan duro na HBK den pasado y tur esnan cu ta trahando na HBK. Boso compromiso pa garantisar bon servicio y cumpli cu e necesidadnan di nos ciudadanonan a haci un diferencia grandi. “Danki di curason pa e servicio, aporte y esfuersonan constante pa mehora e experiencia di

ciudadanonan. Boso ta e cara di gobierno y hunto nos ta traha pa un futuro na unda tur Arubiano por haci uzo di e servicionan na un manera mas facil, eficiente y confiabel. Danki pa boso dedicacion incondicional y ban sigui haci historia hunto. Pabien”, Prome Minister a expresa.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



MINISTER MADURO TA FELICITA PAROKIA DI PARADA CU E 75 ANIVERSARIO DI MISA SANTA FILOMENA



Misa Santa Filomena a cumpli 75 aniversario dedica na e formacion spiritual di e Parokia di Paradera. Pa e ocasion festivo aki Minister Maduro di Cultura tabata presente pa e Santo Sacrificio di Misa guia pa Msgr. Secco dedica na e bunita aniversario aki. Despues di Misa a sigui e apertura di e Cas Parokial cu a keda ful renoba pa sirbi como centro di educacion y actividad pa e parokia di Paradera.

Hunto cu Minister President, Minister Maduro di Cultura a hiba palabra pa felicita Pasto Toti Fuentebella cu e bunita aniversario y tambe gradici'e pa e esfuerzo grandi cu ela haci pa renoba Misa di Paradera y tambe e Centro Parokial na bienestar di e Parokia di Paradera. Minister Maduro ta felicita tur e fielnan di Paradera, specialmente e Comicion cu a keda encarga pa yuda Pasto Toti pa logra keda cla cu e renovacion na tempo pa celebra e 75 aniversario di Misa Santa Filomena di Paradera.







Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD